

# INUIT ATAQATIGIIT

INATSISARTUNI



18. februar 2016

UPA2016/129

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

**Danmarkimi Kalaallit Peqqissartut Illuani ukiuni arlaqartuni nappaaterik peqqutigalugu najugaqartariaqartunut inissialiornissanik Naalakkersuisut misissuinnissamik suliaqaqqullugit peqquneqarnissaannik siunnersuut.**

(Inatsisartunut ilaasortaq Mimi Karlsen, Inuit Ataqatigiit)

## Tunngavilersuut

Ilaqtariinnermut peqqissutsimullu ataatsimiitsitaliap Danmarkimi paasisassarsiornerani december 2015 pulaakkatta ilagaat Kalaallit Peqqissartut Illuat.

Sulisunik oqaloqateqarnitsinni paasitinneqarpugut sivisuumik uninngasunut inissianik amigaateqartoqartoq.

Sivisuumik uninngasut tassaagajuttarput tartuluttut, nunatsinni katsorsarneqarsin-naanginnertik pillugu Danmarkimi najugaqartariaqartut. Taakku ukiut arlallit tartulersitsin-nissaminut utaqqisinnaasarput. Taakku ilaat aammik salitsittarnera pissutigalugu Rigshospitaliliakulasariaqartarput, nunatsinnukarsinnaassanatillu.

Taamatut peqqissartut illuani najugaqartut ineqqani najugaqartarput. Ineqqat sivikitsumik uninngasunut naleqqussakkani ineqartarlutik. Taamatut sivisuumik peqqissartut illuani najugaqartartut ilaasa ukiut 15-it angusimavai, nalinginnaavorli ilaasa ukiuni 4-6-luunniit taamatut utaqqisinnaasarlutik. Arlaqartut nunatsinnut uteratillu toqusarput.

Nunatsinni katsorsarsinnaanngisagut, Danmarkimilu sivisuumik najugaqartittariaqakkagut pitsaunerusumik atugaqartittariaqarpagut. Kialuunniit takorloorsinnaavaa ineqqat qanoq angerlarsimaffippalaartunngornissai ajornartigisut, kiisalu ilaqtanik najorteqarsinnaanissamut qanoq ajornakusoortitsisinnaatiginersut.

Taamaammat Naalakkersuisut misissuillaquakka taamatut sivisuumik uninngasariaqartunut angerlarsimaffiusinnaasunik inissianik pilersitsisinnaanersugut.

Peqqissartut illuani inissialiortoqarsinnaanersoq? Kalaallit Peqqissartut Illuata Savalimmior-miullu Peqqissartut illuata akornaniittut inissiat ilaat pisiarineqarsinnaanersut? Qanoq allatut inissialiortoqarsinnaanersoq misissullaquara.

Sivisuumik Peqqissartut illuaniittariaqartut inissiani ineqarsinnaassagaluarpata inissat allat amerlinerusinnaapput. Sivisuumik peqqissartut angerlarsimaffippalaartumik ukiorpaalunni najugaqarsinnaapput, taamalu inuttut naleqarnerusutut, toqqisisimanarnerusumilu najugaqarsinnaassallutik. Aamma sivikitsumik uninngasunut angerlakaasorpassuarnut sunnertippallaaratik illersorneqarerusumik najugaqalissagaluarpmata.

Taamaammat Naalakkersuisunut misissullaquara sivisuumik, ukiorpaalunni Kalaallit Peqqissartut Illuaniittariaqartunut qanoq ittunik inissialiortinnaanersugut. Naatsorsuutigaaralu Naalakkersuisut misissukkatik Inatsisartunut innersuussillutik aningaasartutissanillu siunnersuuteqarlutik saqqummiussinnaagaat.

## Pisortaqarfinnut aningaasaqarnikkut allaffissornikkullu kingunissat

Kalaallit Peqqissartut Illuani ukiuni arlaqartuni nappaatertik peqqutigalugu najugaqartari-aqartunut inissialiornissanik Naalakkersuisut misissuinissaat allaffissornikkut suliassarta-qassaaq.

Ukioq ataaseq ukiullu affaata aappaa sinnernagu AC-mik suliassat misissuinissap, suliarineqarnera ingerlanneqarnissaa naatsorsuutigineqarpoq, sulisinneqartussallu angalaneranut ineqarneranullu 100.000,- atorneqassallutik.

**Aningaasaqarnikkut allaffissornikkullu inuussutissarsiortunut namminersortunut kingunissai**  
Soqanngilaq

**Aningaasaqarnikkut allaffissornikkullu innuttaasunut kingunissai**  
Soqanngilaq